

## **CONVOCATORIA DE AXUDAS DA UNIVERSIDADE DA CORUÑA PARA A ORGANIZACIÓN DE XORNADAS DIVULGATIVAS E CICLOS DE CONFERENCIAS, ANO 2018 (SETEMBRO-OUTUBRO 2018).**

### **CARACTERÍSTICAS DA CONVOCATORIA**

A Universidade da Coruña (UDC), co obxectivo de promover a difusión da cultura científica e dos coñecementos, publica a segunda convocatoria de axudas do ano 2018 para a organización de xornadas divulgativas e de ciclos de conferencias.

As actividades propostas deberán ter carácter divulgativo e para alén de dirixirse a un público amplo, non estar vinculadas a ningunha outra actividade académica. Diferenciaranse, neste sentido, das reunións científicas, dos congresos, dos encontros entre investigadores ou de calquera outra actividade asimilada, que deberán canalizarse polas convocatorias correspondentes. Poderán participar tamén aquelas actividades, que cumprindo os requisitos, non precisen subvención e queiran acollerse dos beneficios desta convocatoria.

As actividades deberán desenvolverse durante o período comprendido entre o 17 de setembro e o 31 de outubro de 2018.

### **SOLICITANTES E DESTINATARIOS**

Poderán solicitar axudas tanto os departamentos, os institutos ou os centros da UDC –nestes casos a través da súa dirección – como o persoal docente e investigador.

As axudas serán para unha única actividade por solicitante ou solicitantes. Estes non poden figurar en máis dunha solicitude e non ter concedida axuda na Convocatoria de Axudas da Universidade da Coruña para a organización de Xornadas Divulgativas e Ciclos de Conferencias, ano 2018 publicada con data de 30 de xaneiro de 2018.

Darase preferencia, por esta orde, ás solicitudes que procedan da dirección de centros, departamentos ou institutos sobre as de persoal docente e investigador. Valorarase tamén o agrupamento deses ámbitos nunha soa solicitude. Para estes efectos, a solicitude deberá ser coordinada e presentada pola persoa ou persoas que exerzan a dirección do centro, departamento ou instituto.

As solicitudes dirixidas por docentes individuais deberán ter carácter interdepartamental agás no caso de centros que non teñan ou só teñan un departamento, e agrupar a un número significativo de docentes da UDC asinantes da proposta, nunca inferior a dez e sempre con vinculación académica demostrable ao tema proposto.

Todas as solicitudes deberán levar o informe favorable do órgano ou órganos colexiados correspondentes no que deberá constatar que os contidos da actividade proxectada complementan e non se sobrepoñen con ningunha actividade de ensino regrado ou título propio impartido e será acorde coa visión e a misión da UDC, orzamento detallado da actividade (honorarios de cada participante, posibles gastos de desprazamento e aloxamento, publicidade, financiamento externo e outros), destino e uso da posible axuda.

Dado o seu carácter divulgativo, o acceso a estes cursos deberá estar aberto tanto ao estudantado como ao público en xeral.

## FINANCIAMENTO

A contía máxima da axuda prevista para cada actividade será de 2 000 € suxeita á dispoñibilidade orzamentaria. No caso que o importe total de axudas supere o presuposto asignado a esta convocatoria, limitarase a concesión de axudas ás solicitudes mellor puntuadas, ata esgotar a cantidade global. Segundo o volume de gasto en material de promoción e agasallo, este poderá ser deducido da cantidade que se conceda mediante a presente convocatoria. A axuda, que estará formada por esta e pola que proveña doutras fontes de financiamento alleas á UDC así como das cotas de inscrición, deberá cubrir a totalidade dos gastos xerados pola actividade (aloxamento, viaxes e honorarios de relatores, publicidade, etc.).

Contra esta axuda non se poderá cargar gastos de protocolo (xantares, bebidas). En ningún caso a colaboración económica será destinada ao pagamento do profesorado propio ou a pagamento de honorarios á dirección ou secretaria da actividade.

As únicas actividades suxeitas a cota de inscrición poderán ser as xornadas divulgativas. A cota de inscrición non poderá superar os 50 euros para os membros da UDC e para as persoas desempregadas ou os 100 euros para o resto. No caso de existir unha cota, o orzamento terá en conta unha retención do 5 % do total dos ingresos en concepto de custes indirectos.

En ningún caso os ciclos de conferencias esixirán a satisfacción de cotas de matrícula.

Os ingresos en concepto de matrícula e taxas de certificación deberán realizarse a través da conta da UDC, habilitada para os efectos polo Servizo de Xestión Económica a solicitude da organización da actividade. A axuda que no seu caso puidese corresponder será ingresada nesta mesma conta. O presuposto das actividades será xestionado e controlado por este Servizo, de acordo coas normas de xestión do gasto da UDC, sen prexuízo da presenza da Sección de Extensión Universitaria nas actuacións de control.

O importe da colaboración económica que se conceda transferirase á aplicación orzamentaria descentralizada número 226.06 do centro de gasto en que se desenvolva a actividade.

Non se poderá destinar o importe total da axuda a un único gasto salvo coa autorización expresa da Comisión de Extensión Universitaria, nin a incorporación de créditos do remanente ao exercicio seguinte. O remanente sobranterá será reintegrado na partida orzamentaria correspondente da Vicerreitoría de Estudantes, Participación e Extensión Universitaria.

## OBRIGA DOS ORGANIZADORES

As actividades financiadas deberán levarse a cabo até o 31 de outubro de 2018, coas limitacións indicadas no primeiro apartado desta convocatoria.

Todas as actividades incluírán, no material de difusión e na súa publicidade, o símbolo e logotipo da UDC e, de acordo cos convenios asinados por esta, os do Banco Santander Central Hispano ou de aqueles outros organismos que no seu caso se indiquen ás persoas organizadoras.

Unha vez rematada a actividade obxecto de financiamento, deberase remitir á Oficina de Cursos da UDC unha memoria explicativa das actividades desenvolvidas que conteña, como mínimo, un resumo do ciclo, o programa final incluíndo relatores e relatorios, o peche do orzamento coa relación de ingresos e gastos (xustificado co estrato final da partida orzamentaria correspondente na que deberán figurar claramente os conceptos dos gastos incluíndo o nome e apelidos dos relatores), a relación de ingresos obtidos como cota de pagamento dos asistentes, a publicidade difundida, o informe de prensa e calquera outro aspecto que resulte de interese (na web <http://udc.es/occ> pódese atopar o impreso para a presentación da devandita memoria explicativa). Calquera variación respecto da proposta presentada a esta convocatoria deberá ser notificada á Vicerreitoría de Estudantes, Participación e Extensión Universitaria para a súa toma en consideración.

A renuncia, a falta de execución ou o uso da axuda para fin diferente ao declarado dará lugar á imposibilidade de concorrencia á convocatoria ou convocatorias posteriores. Calquera outro incumprimento destas normas poderá producir a incoación de expediente para o reintegro parcial ou total da axuda.

## CRITERIOS DE VALORACIÓN

Serán criterios prioritarios de valoración, por esta orde:

- Grao de centralización da solicitude, tamén por esta orde: varios centros, un só centro, departamento(s) ou instituto(s).
- Concorrencia a convocatorias públicas e financiamento externo documentado.
- Duración da actividade.
- Alcance e carácter da actividade.
- Número de matrículas ou asistencia en convocatorias anteriores.
- Periodicidade.

- Publicacións derivadas de anteriores edicións.
- Grao de participación da UDC na organización e na utilización de medios e recursos propios.
- Interese xustificado e coherencia do programa.
- Xustificación e adecuación do orzamento previsto aos obxectivos propostos.

Non se terán en consideración as seguintes solicitudes de axuda:

- As que non sigan os modelos de solicitude que indica á presente convocatoria.
- As que contén con outras axudas desta ou doutra vicerreitoría da UDC, con independencia do nome con que se presenten.
- As actividades asimilables a cursos de formación ou de verán.
- As organizadas por cursos de mestrado, por títulos propios ou por centos adscritos.
- As solicitudes, individuais ou colectivas, que resulten duplicadas.
- As que demostren incoherencia entre o título e o perfil académico dos solicitantes.
- As que incumpriran as bases da convocatoria en exercicios anteriores.

No caso de coincidencia temática con outra proposta, entendida esta coincidencia por extenso, dado o carácter divulgativo das actividades, consideraranse como unha soa actividade.

A aquelas solicitudes que non acadaron xustificadamente os criterios de valoración indicados seralles minorada proporcionalmente a axuda en vindeiras convocatorias.

## SELECCIÓN

A Comisión Permanente de Participación e Extensión Universitaria formulará á Vicerreitoría de Estudantes, Participación e Extensión Universitaria a proposta de resolución, en que se detallará a relación de solicitantes aos que se lle concede a colaboración económica para o desenvolvemento de actividade que xustifiquen e garantan a súa calidade, o interese e a participación. Esta resolución esgotará a vía administrativa.

## PRAZO E LUGAR DE PRESENTACIÓN

A solicitude, segundo o modelo oficial dispoñible na Oficina de Cursos<sup>1</sup> e na súa Web, [www.udc.gal/occ](http://www.udc.gal/occ), dirixirse á Vicerreitoría de Estudantes, Participación e Extensión Universitaria e presentarse no Rexistro Xeral da UDC (rúa Maestranza 9, 15001 A Coruña), no rexistro auxiliar do campus da Zapateira (Facultade de Ciencias, andar baixo, A Coruña), no rexistro auxiliar do campus de Ferrol (Edificio de Apoio ao Estudo, andar baixo, campus de Esteiro, Ferrol) ou mediante o envío da documentación a través de calquera dos medios establecidos no artigo 16.4 da lei 39/2015, do 1 de outubro, do procedemento administrativo común das administracións públicas ou norma que o substitúa antes das 14:30 h horas do día 29 de xuño de 2018.

<sup>1</sup> Oficina de Cursos: Casa do Lagar, Campus de Elviña, A Coruña; [occ@udc.es](mailto:occ@udc.es); <http://www.udc.gal/occ>; ext. 1963

A Coruña, 11 de xuño de 2018

A vicerreitora de Estudantes, Participación e Extensión Universitaria

Margarita Amor López

## ANEXO 1

Número máximo de solicitudes de axudas para o desenvolvemento de xornadas divulgativas e ciclos de conferencia que pode presentar cada departamento en función do censo de persoal docente e investigador adscrito:

| DEPARTAMENTO                                                                 | NÚMERO DE SOLICITUDES |
|------------------------------------------------------------------------------|-----------------------|
| Bioloxía                                                                     | 2                     |
| Ciencias Biomédicas, Medicina e Fisioterapia                                 | 2                     |
| Ciencias da Navegación e Enxeñaría Mariña                                    | 1                     |
| Ciencias da Saúde                                                            | 2                     |
| Computación                                                                  | 5                     |
| Construcións e Estruturas Arquitectónicas, Cívís e Aeronáuticas              | 2                     |
| Dereito Privado                                                              | 2                     |
| Dereito Público                                                              | 2                     |
| Didácticas Específicas e Métodos de Investigación e Diagnóstico en Educación | 1                     |
| Economía                                                                     | 3                     |
| Educación Física e Deportiva                                                 | 2                     |
| Empresa                                                                      | 2                     |
| Enxeñaría Civil                                                              | 2                     |
| Enxeñaría de Computadores                                                    | 2                     |
| Enxeñaría Industrial                                                         | 1                     |
| Enxeñaría Naval e Industrial                                                 | 2                     |
| Expresión Gráfica Arquitectónica                                             | 1                     |
| Física e Ciencias da Terra                                                   | 1                     |
| Humanidades                                                                  | 1                     |
| Letras                                                                       | 2                     |
| Matemáticas                                                                  | 3                     |
| Pedagogía e Didáctica                                                        | 2                     |
| Proxectos Arquitectónicos, Urbanismo e Composición                           | 1                     |
| Psicoloxía                                                                   | 2                     |
| Química                                                                      | 2                     |
| Socioloxía e Ciencias da Comunicación                                        | 2                     |